

EACHDRAIDH AN IASGAICH AN LEODHAS

Ach an latha chailleadh margaidhean na Roinn-Eòrpa airson an sgadain shailt chuir sin cabhag air chabhaig air a' chùis, gus mu dheireadh gu faodar a ràdh nach fhiach iasgach Steòrnabhaigh a bhith bruidhinn air.

An till na Leódhasaich gu iasgach an sgadain tuilleadh? Chan eil e furasda freagairt earbsach a thoirt do'n cheist sin aig an àm. Ach tha e cinnteach gu leòir mur tig leasachadh air cor an iasgaich a dh'ùine aithghearr bidh e doirbh òigridh fhaotainn 's an Eilean a roghnaicheas an obair-sa a bhàrr air obair-tìre.

Tha acfhuinn iasgaich ro chosgail an diugh, agus tha margaidh an sgadain ro neo-chinnteach airson òigridh sgoinneil a thàladh.

Tha cosnadh cinnteach air tìr nas roghnaiche leò na saothair gun duais iomchuidh 'na lorg. Nuair nach robh obair eile ann agus a bha pàigheadh glé bhochd air fheabhas, cha robh cor an iasgair a' coimhead cho doirbh idir, ach an diugh nuair a tha oibrichean eile nas fhasa lorg agus an duais nas cothromaiche agus nas cinntiche chan eil iongnadh ann gu bheil iasgairean na dùthcha cur cùil ris a' mhuir.

A ris, chan fhaigh an t-iasgair cuideachadh 'na fheum o'n riaghaltas mar a gheibh am fear-oibreach air tìr nuair a bhios e mach a' obair. Chan eil an lagh a' ceadachadh dha còmhnaidh ach ri àm an iasgaich, ma bhios e diomhain, ach chan urrainn e bhith beò air a' ghaoith aig a' leithid sin a dh'àm a bharrachd air àm sam bith eile.

Mur bi an t-iasgair cinnteach as a theachd-an-tìr fad na bliadhna mar a tha cosnaichean eile cha leig sinn a leas dùil a bhith againn gu lean e an obair daonnan.

Is e an aon nì a bheir air ais cuid de na chuir cùl ris an iasgach a cheana, agus a dh'fhadas iarrtas an cridhe na h-òigridh togradh ris an obair, gun dearbhar dhaibh gur fhiach i an t-saothair: gu bheil an duais cinnteach ma nì iad saothair dhligeach.

Ach có as urrainn an dearbhadh sin a thoirt dhaibh mar a tha cùisean an diugh? Agus dé dh'fheumas àite ghabhail mus bi dearbhadh cinnteach ri thoirt seachad? Am feum an riaghaltas, iad fhéin, bàtaichean iasgaich agus acfhuinn iasgaich ullachadh, agus iasgairean a phàigheadh air son an oibreachadh? Mur dèan an riaghaltas e, an dèan buidheannan làidir eile an obair a ghabhail os làimh?

Bidh feum air sgadan cho fada 's a bhios daoine ann a dh'itheas e. Bidh feum air iasgairean cho fada 's a dh'fheumar eòlas na mara gu bhith dìon na rioghachd. Nach bu chòir a réisid do'n luchd riaghlaidh cnuasachadh gu cùramach mu'n ghnòthuch agus gach oidhirp a dhèanamh gu bhith cur an iasgaich-sa air stéidh a ris?

An uair a tha an rioghachd againne cho mór an urra ri dùthchannan céine air son na dh'fheumar chum an sluagh a bheathachadh nach eil e ro iomchuidh, chan e a mhàin gun giùlaineadh an talamh de bhàrr nas urrainn e chur dheth, ach mar an ceudna, gun dèante gach dìcheall gu bhith glacadh an éisg a tha am freasdal caomh a' stiùireadh dh'ionnsaigh nan cladaichean againn?